

# O SCIÒ PALOSSO

RESUSCITOU

pé vedde ai 2 de Zugno

A CASAZZA DE FOXINNE

Ottave Leneixi

SCRÎTE

DA - O *TOCCA EJUS*

Arcade do Bejagno.



ZENA, 1822.

STAMPAJA PAGAN, Ciazza Nêuva N.º 43.

*Con permiscion.*

*Simone de J. G. M.*

BIBLIOTHECA  
REGIA  
MONACENSIS.

---

**L'** ombra do Sciô *Palosso* a l'é scappâ  
Dä seportûa da Foxe a-o cæo de stelle  
Cö naso rotto, e a bocca roziggîa  
Dai ratti, dai scorpioin, e da-e cæe-belle;  
Tutta allegra però de ritornâ  
Unn' âtra volta a-o Mondo in ta so pelle,  
Pé vedde cose degne de stupô,  
E a l'aspêta pé intrâ, che sponte o sô.

S' arve e Porte da Pilla, e a primma vista  
Se ghe presenta o gäoso da l' Uspiâ,  
Veddendo i doi Cammëadda, o se rattrista  
Che l'an cacciou co-i âtri a fâ ingrasciâ,  
E che o mettian de néuvo in sciâ gran lista,  
S' o ghe torna a fâ a burla de creppâ,  
Ed un de questi o dixè con spavento:  
Quello là o pâ *Palosso* in mæ züamento.

Ma 'coccio, coccio o passa, e i doi becchin  
 Son che co-i âtri l'han buttou in to fosso ;  
 Quelli van verso a crêusa do Tacchin,  
 E verso Pontexello vâ *Palosso*.  
 Un miggiâ sciorte fêua de biricchin,  
 Co-i stroxi, e co-e sasciæ ghe sâta addosso ,  
 E sbraggian tanto, che ghe manca o scioù :.  
 Dæghea, te-o chi, ch' o l' é resuscitòu.

Ma un Genio, chi o protêze o l'hà a-o so fianco,  
 Ch' o no vèu che nisciun ghe dagghe breiga ;  
*Palosso*, ch' o se sente meze stanco,  
 Perchè a so gamba storta a se ghe ceiga,  
 O s' arremba de torte a-o primmo banco,  
 Co-i èuggi, e l' appetitto o-e soierbe, o-e seiga ;  
 Tutte e stacche o s' inversa ; ma despeoù  
 Comme o l' é morto, o l' é resuscitòu.

Ma mentre o stà all' odô da pasqualinna,  
 E che han finî de fâghe o borattin,  
 O vedde, che un gran mondo o s' avvizinna,  
 E o sente mille voxi, e mille soin,  
 O stende o collo, e poi perdingohinna !  
 O criâ : Miaz là, l' é chi San Giacomîn ;  
 Veddo o cavallo co-a valdrappa d' ou !  
 Portoja, allegri, allegri, l' é chi o Mòu.

Aoa scì, che me pâ de tornâ à nasce,  
 Son proprio soddisfatto e consolou,  
 De vista, e de piaxei o coêu o se pasce,  
 Viva o destin, ch' o m' hà resuscitou,  
 E ch' o me fà mesciâ torna e ganascie,  
 Sciben che n' aggie tanto meritou.  
 Scialla Manena; l' estro zà me sento,  
 Vèuggio cantâ strunelli a çento a çento.

Tanto che o stâ lì pe commençâ,  
 S' avvanza a gran Casazza do Maggiò,  
 A-o Confalon no ghe manca, che o parlâ,  
 L' ou o ghe brilla da fâ e ficche ao sô.  
 Un cavallin ciù cào chi pèu trovâ?  
 E un Giacomìn, ch' o pâ do Çé l' onô?  
 Che bande, che superbi ritornelli,  
 Quante lummi, che impronti, che fradelli!

Un concerto di megio Professori  
 Han tutte e Croxe; evviva a gran Seioria;  
 Che ordine! van tutti a doi a doi  
 Con modestia, con garbo, e scignoria.  
 Semmo e Foxinne, dixan, semmo noi,  
 Ae speize all' occaxion no se gh' amia.  
 No semmo a ninte ancon, Zena a vediâ  
 Cose, che no se pèuan manco assunnâ.

Sitto, che canta i bravi pellegrin ;

Ah! che aietta, me sento recillà!

Che voxiette, pään tanti campanin :

Bravi gardetti, questo o l' é cantà.

Che recammi, che freschi tabarrin!

I pastorali fan straçecolà.

Che braçço gh' èu pe arrezai, doi Giganti

Han vestio sempre i bravi Foxinnanti.

Torna Muxica, asbrìa ... Ah! l' é chi o Möu ;

A seja a sguacço, all' avarizia morte,

L' argento, è perle, è gioje, i cöali, e l' öu

Ghe son stæti versæ pe bonna sorte.

Intorno ai deputæ, che ghe fan cöu

Questo e quello Portoù se mostra forte

Cö Cristo in crocco infioù senza toccâlo,

E o sta ciantoù, comme s' o fise un pâlo.

Ritornelli a bezeffe, e torce a sguasso,

I Fræ cäsæ de negro, e in fubbie d' öu,

Personne invexendæ, che ad ogni passo

Senti, che dixon: Benedetto o Möu!

Violin, trombe, fagotti, contrôbasso

Careghette, barcoin, porteghi a nöu:

Pe scrive tutto me gh' oria un messâ,

O un fèggio, comme a ciaçça da Nunziâ.

Sara o crocco a gran Cassia, oh che esprescion

Maragian o l' à fæto parlâ o legno,

Ogni figûa fà vedde unna pascion,

Ogni testa; ogni gamba a l' é à so segno;

So' i Moi, e i Saraceni in confuxion;

Tutto de l' arte, e de l' Aotò, l' é degno.

Ma s' ol vedde unna cosa de ciù ardîe

Mia o cavallo, e scappæ, co no ve tie.

*Palosso*, ti é contento, aoa ti pèu

Tornatene lazzù coi ciù a quetâ,

Ma tutti i anni se o destin o véu

Te prometto de fâte ritornâ,

E dâte o gusto, che t'ò dêto anchèu,

Vattene all' âtro mondo a raccontâ

Cose ti æ visto, e cose ti êu ancon vedde;

E che faççe âtrettanto, chi no credde.

Appenna queste paole proferîe

Dao Genio protettò do gran *Palosso*,

Sciorte unna squaddra fèua de brutte Arpie,

E se ghe caccian tutte quante addosso;

Appenna son spontæ, che son sparîe,

Appenna l' han toccou, ch' o l' é in to fosso.

Bon viâgio, l' han ben fæto camminâ;

Aian poia, ch' o n' o gh' oèse ciù tornâ.

Ma han puto gaibo i servitoi da morte ,  
Son paggi che non han de disereçion ,  
Sença angosciase nri nò se ne sciorte ,  
In tutti i moddi se vèan fa raxion ,  
Meschin quello che scappa da-e so porte ,  
O l'hà feta pe sempre in to carbon ,  
Ma felice chi pœu , comme *Palosso*  
Vedde e Foriane, e poi tornà in to fosso.